

Augsburg, 30. April 1556

An Caspar von Niedbruck

ÖNB Wien, Cod. 9737^k, fol. 65r.

S. P. D. Quae ad Barlaamum et Birckmanni libros attinent, clarissime vir, domine et patronē obseruande, bene se habent, cum ab ijs probentur, quorum interest. Ego tum, ignarus voluntatis herilis, ea scripsi, quae recta esse putabam, cum in genere mandatum esset, ne quos libros superuacaneos in Bibliothecam admitterem. Ab Arnoldo nostro his nondinis nihil librorum accepi. Sed si quid Antuerpia miserit, quod breui futurum arbitror, excellentiae tuae, cùm in ea re tūm alijs omnibus pro virili mea libens morem geram: omniqüe studio elaborabo, ne te beneuolentiae erga me tuae ac tam propensi animi vnquam paenitere possit. Cuius inter caetera illud mihi euidens et pergratum argumentum est, quod conatus meos conuertendi Zonarae, misso tuo codice benigne te subleuaturum polliceris: idqüe vt facias quam primum, etiam atque etiam oro. Tres eius operis partes sunt, I. de rebus Iudaicis ex veteri potiss[imum] testamento et Iosephi antiquitatibus: quae multas lacunas habet: II. de prophanis imperatoribus, cuius duo exempla habeo III. de Christianis imperatorib[us] quae et historia Ecclesiastica inscribitur: cuius tres mihi codices suppetunt, rebus congruentes, in verbis saepe non parum discrepantes. quas διαφωνίας vel in marginibus vel in fine codicis annotandas a typographis curabo, si vixero. Quòd si tui exempli subsidio vel truncata complere, vel deprauata restituere licuerit: gaudebo, nec id duntaxat sartum tecum quam primum restituam, sed auctario etiam excusi graecolatini codicis cumulabo. Vale. Augustae Vindelicorum, ex hortis herilibus, vbi nunc caeteris ferè occupationibus liber, omne studium et tempus Zonarae conuersioni tribuo: cuius, nisi valetudo saepius interpellaret, ante Cal[endas] Nouembris absoluendi spem haberem. ἀλλ' ὡς δυνάμεθα, ἐπειδὴ ὡς βουλόμεθα, οὐ δυνάμεθα. Pridie Cal[endas] Maias Anno 1556.

E. T.
obseruantiss[imus]
Hiero[nymus] Wolfius.